


Obispado a tuma despedida di padernan di Orden di San Dominiko



WILLEMSTAD – Ayera mainta a tuma despedida di padernan di Òrdu di San Dominiko na Katedral di Pietermaai. Ku esei tambe a sera un epoka na e islanan di Antia i Aruba den kua e padernan aki a hasi nan mes masha instrumental riba desaroyo di diferente tereno. Komo ku despues di basta dia awa a kai ayera Obispu Monsejor Luis Secco a bisa ku hasta shelu a yora ku e padernan a bai for di Korsou. E padernan a yega Antia 140 aña pasá for di Hulanda pa evangelisá i traha riba formashon di e poblashonnan di nos islanan.

E despedida a tuma lugá durante di un Santu Sakrifisio di misa selebrá pa Mgr. Luis Antonio Secco i asistí pa e último padernan Dominiko pader Piet Magnin O.P., pader Toine Frehe O.P. i pader Wijbe Fransen for di Aruba i tambe pastor Stanislau. Durante di e misa Mgr. Secco a elaborá riba e trabou largu i duru ku padernan Dominikano a desplegá na interes di nos komunidatnan di Antia i Aruba. E padernan a gradisí mgr. Secco i pueblo di Antia i Aruba pa e privilegio di por a traha riba nos islanan i sera lasonan di

amistat fuerte i duradero.

Asistensha na e santu sakrifisio di misa tabata hopi grandi i un kor speshalmente organisá ku otro kornan di Kòrsou pa e okashon aki bou di direkshon di Sr. Rignald Yankey a trese un misa kanta masha bunita na latin. Hopi tabata esnan ku a keda komentá e presentashon magnífico di Sr. Yankey komo dirigente, Sr. Johnny Kleinmoedig tokando e òrgel grandi renobá di Katedral komo integrantenan di e kor speshal aki.

Padernan Dominikano a risibí komo regalo dos kuadro di Katedral 'Bírgen di Rosario' di Pietermaai i di e konbentu grandi na Julianaplein.

E deboshon, palabranan di elokuensha i rekuerdonan di algun dékada pasá a emoshoná tantu e saserdotenan ku ta bai komo fielnan presente. Tabata un okashon históriko. Na final fielnan por a tuma despedida personalmente di e padernan den buurthuis Mokapi i gradisí nan pa tur e loke nan hasi pa nos pueblonan durante di e époka ku a kaba di klousurá.